

## I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

### LURRALDE OREKAREN SAILA

**1854/2020, uztailaren 7aren Ebazpena. Arabako Foru Aldundiaren eta Kanpezu-Arabako Mendialdea Kuadrillaren arteko hitzarmena argitaratzea. Hitzarmen horren bidez, kudeaketa esleipen bat ezartzen da aisialdirako tokiko parkeetan zaborrak biltzeko lanetarako**

Foru Gobernu Kontseiluaren otsailaren 25eko 115/2020 Erabakiaren bidez, Kanpezu-Arabako Mendialdea Kuadrillarekin hitzarmen berri bat sinatzea onetsi zen. Hitzarmen horretan ezartzen da zaborrak biltzeko lanak kudeatzeko esleipena, eta ondoren hondakinak kudeatzeko baimendutako instalazio batera eramatea, San Vitor, Santa Teodosia, Santa Lucia, Fresnedo, Ibernalo eta Okon aisialdirako tokiko parkeetan dauden edukiontziak balorizatu eta tratatzeko. Horiek guztiak foru-aldundiarenak dira. Hitzarmen horrek, gutxienez, lau urteko indarraldia izango du, 2020ko urtarrilaren 1etik 2023ko abenduaren 31ra.

Sektore Publikoaren Kontratuei buruzko urriaren 1eko 41/2015 Legearen 11.3-b artikuluan xedatutakoari jarraituz,

#### EBAZTEN DUT

Hitzarmen hori, ebazpen honi erantsirik doana, ALHAOn argitaratzea.

Vitoria-Gasteiz, 2020ko uztailaren 7a

*Lurralde Orekaren zuzendaria*

JESÚS MARÍA GUINEA DÍAZ DE OTALORA

#### ERANSKINA

HITZARMENA, ARABAKO FORU ALDUNDIKO LURRALDE OREKAREN SAILAREN ETA KANPEZU-ARABAKO MENDIALDEA KUADRILLAREN ARTEKOA, HONAKO LAN HAUEK KUDEATZEKO ARDURA EMATEKO: ARABAKO FORU ALDUNDIAREN SAN VITOR, SANTA TEODOSIA, SANTA LUCIA, FRESNEDO, IBERNALO ETA OKONGO AISIALDIRAKO TOKIKO PARKEETAKO EDUKIONTZIETAKO ZABORRA ETA HONDAKINAK BILTZEA ETA HONDAKIN KUDEATZAILE BAIMENDU BATERA ERAMATEA

Vitoria-Gasteiz, 2020ko ekainaren 1a.

#### BILDU DIRA

Batetik, Irma Basterra Ugarriza andrea, Arabako Foru Aldundiko Lurralde Orekaren Saileko diputatua (Diputatu Nagusiaren uztailaren 5eko 325/2019 Foru Dekretuaren bidez izendatua), Aldundiaren ordezkari lanetan, daukan karguaz eta Foru Gobernu Kontseiluak 2020ko otsailaren 25an 115/2020 Erabakiaren bidez emandako ordezkarietzaz baliatuz.

Bestetik, Anartz Gorrotxategi Elorriaga jauna, Kanpezu-Arabako Mendialdea Kuadrillako presidentea, kuadrillaren ordezkari gisa, Batzar Orokorrak 2020ko maiatzaren 26an hartutako erabakiaren bidez emandako baimenaz baliatuz.

Alderdiek hitzarmen hau sinatzeko behar den gaitasuna onartzen diote elkarri eta honako hau

#### ADIERAZTEN DUTE

I. Euskal Autonomia Erkidegoko Autonomia Estatutuak 24.2 eta 37. artikuluetan eta azaroaren 25eko 27/1983 Legeak (autonomia-elkarte osorako erakundeen eta bertako kondaira-lurraldeetako foruzko ihardutze-erakundeen arteko harremani buruzkoa) 7.1 artikuluan onesten dute Arabako Lurralde Historikoak foru organoak antolatze eta haien araubidea ezartzeko eskumena daukala. Bada, eskumen hori erabiltzeko Arabako Foru Aldundiak abenduaren 18ko 52/1992 Foru Arauak (Arabako Foru Aldundiaren Antolaketa, Funtzionamendu eta Araubide Juridikoari buruzkoa) xedatzen duena aplikatzen du.

II. Lurralde Orekaren Saila Diputatu Nagusiaren uztailaren 5eko 324/2019 Foru Dekretuaren bidez sortu zen (2019-2023 agintaldirako Arabako Foru Aldundiaren sailak zehazten dituena), Foru Aldundiak toki erakundeentzako aholkularitzaren arloan eta Arabako Lurralde Historikoko aisialdiko toki parkeen mantentzearen arloan dauzkan eskumenak erabiltzeko, besteak beste.

Eskumen horiek 52/1992 Foru Arauak 38., 40., 70. eta 73. artikuluetan eta horiekin zerikusia dutenetan sail guztiei oro har ematen dizkien ahalmenen eta eskuduntzen esparruan erabiltzen ditu Lurralde Orekaren Sailak.

III. Diputatuen Kontseiluaren otsailaren 9ko 9/2016 Foru Dekretuak 12. artikuluan Toki Administrazioaren eta Larrialdien Zerbitzuak Lurralde Orekaren Zuzendaritzaren barruan egin beharreko lanak ezarri zituen. Besteak beste, 1.f) puntuan ezartzen du aisialdirako tokiko parkeak sortu, zaindu eta mantentzeko sustapena, kontrola eta koordinazioa dagozkiola.

IV. 1985. urtean aisialdirako tokiko parkeak sortu ziren. Harrezkero, parkeok artatzeko eta mantentzeko lanen barruan, erabiltzaileek sortzen dituzten zaborrak biltzen dira eta hondakinak kudeatzeko baimena daukan entitate batera eramaten dira.

V. Urriaren 1eko 40/2015 Legeak, Sektore Publikoaren Araubide Juridikoarenak (hemendik aurrera SPAJL), honako hau ezartzen du 11. artikuluko ("Kudeaketa gomendioak") 1. apartatuan:

"Administrazio-organoen edo zuzenbide publikoko entitateen eskumeneko jarduera materialak edo teknikoak administrazio bereko edo beste bateko beste organo edo zuzenbide publikoko entitateen gomendio utz daitezke, jarduera horiek haien eskumenen barruan badaude, efikaziari begira komeni bada, edo jarduera horiek gauzatzeko baliabide tekniko egokirik ez badago"

Eta artikuluko bereko 3.b apartatuan honako hau ezartzen du:

"Kudeaketa-gomendioa administrazio desberdinetako organo edo zuzenbide publikoko entitateen artean egiten denean, dagokion hitzarmena izenpetuz formalizatuko da; (...). Aipatutako hitzarmena Estatuko Aldizkari Ofizialean, autonomia-erkidegoko aldizkari ofizialean edo probintziakoan argitaratuko da, gomendioa egiten duen organoa zein administrazioetako den kontuan hartuta"

Horrekin guztiarekin bat etorritik, alderdiek honako hau

#### ADOSTEN DUTE

Klausulak:

#### **Lehenengoa. Hitzarmenaren xedea (SPAJL, 49.b artikulua)**

Hitzarmen honen xedea da oinarrizko baldintzak ezartzea San Vitor, Santa Teodosia, Santa Lucia, Fresnedo, Ibernalo eta Okon aisialdirako tokiko parkeetako edukiontzietako zaborra biltzeko eta hondakin kudeatzaile baimendu batera eramateko lanak egiteko ardura emateko.

**Bigarrena. Alderdiak onartzen dituzten betebeharrak eta konpromisoak (SPAJL, 49.d artikulua) eta horiek bete ezean jasango dituzten ondorioak (SPAJL, 49.e artikulua)****A) Kanpezu-Arabako Mendialdea Kuadrillaren aldetik:**

Kanpezu-Arabako Mendialdea Kuadrillak bere lurraldeko herriguneetan sortzen diren zaborrak eta hondakinak biltzeko eta hondakin kudeatzaile baimendu batera eramateko kontratatzen duen enpresaren zerbitzua kudeatu beharko du.

Aisialdirako tokiko parke bakoitzean gutxienezko edukiontzi kopuru bat ipini beharko da eta zerbitzua gutxienezko maiztasun batekin egin beharko da:

URTEKO ALDIA			
PARKEAK	EDUKIONTZIAK	EKAINAREN 1ETIK IRAILAREN 30ERA	URRIAREN 1ETIK MAIATZAREN 31RA
San Vitor	1 HHS	1 egun astean	1 egun astean
Santa Teodosia	2 HHS	2 egun astean	1 egun astean
Santa Lucia	2 HHS	1 egun astean	1 egun astean
Fresnedo	2 HHS	2 egun astean	1 egun astean
Ibernalo	2 HHS + 1 ontziak	1 egun astean	1 egun astean
Okon	2 HHS	2 egun astean	1 egun astean

Parkeetan sortzen diren zaborrak eta hondakin solidoak aurreko taulan azaltzen diren gutxienezko maiztasunekin biltzeaz gainera, zerbitzuan honako lan baldintza hauek bete behar dira:

a) Biltzen diren zaborrak eta hondakinak hondakin kudeatzaile baimendu batera eraman behar dira.

b) Edukiontziak garbitu, desinfektatu eta desintsektatu egin behar dira, udan hilean behin gutxienez eta gainerakoan hiru hiletik behin, eta Toki Administrazioaren eta Larrialdien Zerbitzuak arrazoiak azalduta agintzen duenean ere bai.

c) Edukiontziak dauden tokiak eta haien eraginpeko eremuak garbitu behar dira.

d) Edukiontziak tokiko parke batetik beste batera edo Aldundiko Parke Mugikorretik parkeetara eta alderantziz mugitu behar badira, Toki Administrazioaren eta Larrialdien Zerbitzuko arduradunak adierazita, lan horiek doan egingo dira.

Kuadrillak zerbitzua kudeatzeko ardura daukan urte bakoitzerako aurrekontua bidali behar dio Lurralde Orekaren Saileko Toki Administrazioaren eta Larrialdien Zerbitzuari, aurreko urteko abenduaren amaieran.

Hitzarmena indarrean dagoen lehen urteko (2020ko ekitaldia) gehieneko aurrekontua 4.549,56 eurokoa izango da (BEZa barne), eta indarraldiko eta isilbidezko luzapeneko hurrengo ekitaldietakoa ere kopuru berekoa izango da (2021, 2022 eta 2023), ardura jasotzen duen kuadrillak lanen kostuaren igoera justifikatu ezean; nolahi ere, aurrekontua ezin izango da izan Foru Aldundiaren ekitaldi horietako aurrekontuetako partidan ezarritako kopurua baino handiagoa.

**B) Arabako Foru Aldundiaren betebeharrak:**

Arabako Foru Aldundiak ekitaldi bakoitzerako aurkezten den aurrekontua aztertuko du, eta ontzat eman ondoren, osorik finantzatuko du aipatutako parkeetako zaborrak biltzeko, hondakin kudeatzaile baimendura eramateko eta edukiontziak eta haiek dauden tokiak garbitzeko lanen zerbitzua.

Lurralde Orekaren Sailak sei hilean behin emango du lanak ordaintzeko agindua; horretarako, kuadrillak hiruhilekoa amaitu aurretik aurkeztu beharko ditu aldi horretan egindako lanen fakturak, eta Toki Administrazioaren eta Larrialdien Zerbitzuak horiekiko adostasuna adierazi beharko du.

Hitzarmen honen indarraldian Lurralde Oreaken Sailak kuadrillari zerbitzugintza luzatzeko edo bertan behera uzteko eskatu ahal izango dio, baldin eta aplikatzen den esparruan aisialdirako tokiko parke berriren bat egiten bada edo daudenetako bati baja ematen bazaio.

C) Alderdiek onartutako betebeharrak eta konpromisoak urratzearen ondorioak:

Kanpezu-Arabako Mendialdea Kuadrillak edo lanen esleipena jasotzen duen enpresak ez badu behar bezala betetzen Arabako Foru Aldundiak emandako ardura, Aldundiak eskubidea edukiko du emandako ardura amaitutzat jotzeko eta aurkezten zaizkion fakturak eta frogagiriak ez balioztatzeko eta ez ordaintzeko.

#### **Hirugarrena. Hitzarmenean ematen den ardura gauzatzeko den jarraitzeko, zaintzeko eta kontrolatzeko mekanismoak (SPAJL, 40.f artikulua)**

Jarraipen batzordea eratzen da, alderdien arteko lankidetzak eta harremana estuak izan daitezkeen eta hitzarmenaren xedea gauzatzeko egin beharreko jarduketak ondo koordinatzeko. Hona hemen kideak:

– Arabako Foru Aldundiaren ordezkaria, Toki Administrazioaren eta Larrialdien Zerbitzuko burua edo hark eskuordetzen duen pertsona.

– Kanpezu-Arabako Mendialdea Kuadrillaren ordezkaria, gerentea edo hark eskuordetzen duen pertsona.

Jarraipen batzordea alderdi batek eskatuz gero bilduko da, emandako ardura behar bezala betetzeko lanetan edo lanen fakturen eta ordainketen inguruan sortzen diren auziak aztertzeko.

Alderdiek hitzarmenaren dute elkar hartuta aurkituko dietela irtenbidea hitzarmen hau edo honen ondoriozko erabaki espezifikoak interpretatu edo betetzean sor daitezkeen desadostasunei.

#### **Laugarrena. Hitzarmena aldatzeko araubidea (SPAJL, 49.g artikulua)**

Hitzarmen hau edo bertan arautzen den kudeaketa ardura aldatzeko sinatzaileen ahobatezko adostasuna beharko da.

#### **Bosgarrena. Indarraldia (SPAJL, 49.h artikulua)**

Hitzarmen hau lau urtez egongo da indarrean, 2020ko urtarrilaren 1etik 2023ko abenduaren 31ra arte. Indarraldia amaitu baino lehen luzatu ahal izango da, behin bakarrik eta gehienez beste lau urterako; horretarako, alderdien ahobatezko adostasuna beharko da.

Lanak kudeatzeko ardura urtebeterako da, 2020ko urtarrilaren 1etik aurrera; beste hiru urtez luzatu ahal izango da gehienez, edo beste lau urtez, 2020-2023 aldia amaitutakoan, hitzarmena bezala, eta horretarako ere alderdien arteko adostasuna beharko da, eta prezioa kuadrillak indarraldiko urte bakoitzaren hasieran eskaintzen eta aurrekontuan ezartzen duena izango da, Arabako Foru Aldundiak onartu ondoren, baldin eta alderdietako batek ere ez badu proposatzen hitzarmena azkentzea ekitaldia amaitu baino bi hilabete lehenago, indarraldiaren barruan.

Lehen lau urteetan, urte amaitu baino lehen alderdietako batek ere ez badu eskatzen hitzarmena azkentzea, hurrengo urterako isilbidez luzatutzat joko da.

#### **Seigarrena. Hitzarmena azkentzeko eta suntsitzeko arrazoiak (SPAJL, 51. artikulua)**

Hitzarmen hau indarraldia amaitutakoan azkenduko da; horrez gainera, honako arrazoi hauengatik suntsituko da:

Hitzarmena suntsiarazteko arrazoiak:

a) Hitzarmenaren indarraldian lau urteko luzapena ez adostea.

b) Sinatzaile guztiek edo haien karguetako ondorengoek aho batez adostea hitzarmena suntsitzea.

c) Oro har, alderdi batek hitzarmen honen ondoriozko betebeharetako bat ez betetzea.

Kasu horretan, alderdietako edozeinek errekerimendua helarazi ahal izango dio betebeharra bete ez duen alderdiari, epealdi jakin batean bete dezan bete gabekotzat jotzen den betebeharra edo konpromisoa.

Errekerimenduan adierazitako epealdian egoerak bere horretan jarraitzen badu, hau da, ez bada betetzen bete gabekoa, errekerimendua egin duen alderdiak besteari jakinaraziko dio hitzarmena suntsitzeko arrazoia gertatu dela, eta hitzarmena suntsituzat joko da.

d) Epai bidez adieraztea hitzarmena deuseza dela.

SPJALk 52. artikuluan xedatzen duenaren ondorioetarako, alderdiek adosten dute hitzarmena suntsitzeak inolaz ere ez duela ekarriko sinatzaileek kalteordaina eman beharra.

#### **Zazpigarrena. Hitzarmenaren izaera eta jurisdikzio eskuduna**

Hitzarmen hau administratiboa da. Hitzarmenaren interpretazioaren eta gauzatzearen inguruan sortzen diren auziak administrazioarekiko auzien jurisdikzioari jakinarazi beharko zaizkio eta haren eskumenekoak izango dira.

Eta ados daudela adierazteko, alderdiek hitzarmen hau sinatzen dute goiburuan adierazitako tokian eta egunean.

Arabako Foru Aldundiaren ordezkaria

IRMA BASTERRA UGARRIZA

Kanpezu-Arabako Mendialdea Kuadrillaren ordezkaria

ANARTZ GORROTXATEGI ELORRIAGA